



5. februar 2014

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit KNI pillugu**

**1. Suna pissutaava KNI A/S-p immikkut ataatsimeersuarnissaanut suli aggersaasoqarsimanginneranut?**

**2. KNI A/S-mi siulersuisuni ilaasortassanik toqqaanermut atatillugu toqqakkat sunik piginnaaneqarnissaat Naalakkersuisut pingaernerutinniarpaat**

**3. KNI A/S-mi suli immikkut ittumik ataatsimeersuarnissamut aggersaasoqarsimangimmat pissutaasimanerluni Naalakkersuisut siulersuisuni ilaasortassanik piukkunnartunik nassaarsinnaasimanginnerat?**

(Inatsisartunut ilaasortaq Andreas Uldum, Demokraatit)

**Tungavilersuut:**

2013-mi aasakkut KNI A/S-ip ataatsimeersuarnerani siulersuisunut ilaasortassatut toqqagaasimasut pingasut tunuarput. Taamaakkaluortoq Naalakkersuisut piginnittutut suli immikkut ataatsimeersuarnissamut aggersaanikuunngillat.

Tamanna eqqumiippoq, Naalakkersuisut decemberimi nalunaarutigimmassuk ataatsimeersuortoqarumaartoq. § 37 tungavigalugu apeqqummut normu 229-mut (9/12-2013) akissummini Naalakkersuisut Siulittaasuat imatut allappoq:

*”Maannakuugallartoq Naalakkersuisut pingaarnertut kissaatigaat ingerlatseqatigiiffiup eqqissilluni suleriaasissaminik nassaarniassasoq taamaasillunilu pitsaasumik aalliararluni. Naalakkersuisut siulersuisuni ilaasortat piukkunnartunik ilaniarpaat, piginnaanilinnik KNI A/S-mut iluaqusiinnaasunik. Piffissaq ungasinnerumaaq isigalugu Naalakkersuisut siulersuisunngortut oqaloqatiginiarpaat ineriartortitseqqinnissaq pillugu taamatullu ingerlatseqatigiiffimmut piginnittuunerup pilersaarusiornissaa pillugu.”*

§ 37 tungavigalugu apeqqummut normu 251-mut (16/12-2013) akissummini Naalakkersuisut Siulittaasuat imatut allappoq:

*”Siusinnerusukkut pisortaanerup Claus Jensenip, soraamerata malitsigisaanik siulersuisuni ilaasortaasut 3, ataatsimeersuarnermi qinigaasut, tunuarnissatik toqqaraat Naalakkersuisut paasivaat. Taamaattumik qinigaasut tunuartut taakku pingasuusut taartissaat naleqquttut nassaariniarlugit Naalakkersuisut maannakkorpiaq suliaqarput. Tamanna pereepat, siulersuisut nutaat siullertut suliakkerneqassapput*



*pisortaanermik ataavartussamik atorfinitsitissartik, KNI A/S-ip iluani killilersuisinnaasumik ingerlatseqatigiiffimmilu pissutsinik aalaakkaasunik torersunillu pilersitsisinnaasumik.”*

Naalackersuisut Siulittaasuata taamatut oqarmat allatut paasisassaangilaq, Naalackersuisut KNI A/S-imut kisimik piginnittutut kissaatigigaat immikkut ittumik ataatsimeersuarnermi siulersuisunut ilaasortassat nutaat ilaat piukkunnartut toqqarneqassamaartut.

Tamanna tunngavigalugu Demokratini eqqumiigaarput immikkut ittumik ataatsimeersuartitsinissamut suli suliniuteqartoqarsimarpasinngimmat.

Apeqqutit akeqquneqarput ullut sulliviit naliginnaasut 10-t iluanni.